

Inzko se sastao sa generalnim tajnikom UN-a Banom Ki-moonom



Visoki predstavnik i posebni predstavnik EU Valentin Inzko se kasno jučer u New Yorku sastao sa generalnim tajnikom UN-a Banom Ki-moonom. Informirajući generalnog tajnika UN-a o političkim događanjima u Bosni i Hercegovini, visoki predstavnik/posebni predstavnik EU također je pozdravio usvajanje Rezolucije Vijeća sigurnosti UN-a broj 1895, kojom se mandat EUFOR-a produžava do kraja 2010. godine.

“Vodi se važna politička debata koja do sada nije uspjela riješiti ključne političke probleme u Bosni i Hercegovini,” rekao je visoki predstavnik/posebni predstavnik EU Inzko. Primijetivši da je BiH društvo sa “posebnim načinima dolaženja do koncenzusa” visoki predstavnik/posebni predstavnik EU Inzko je rekao da je uvjeren da će “BiH naći put”.

Silazna politička putanja koja traje tri godine, ukazala je na strukturalne nedostatke Daytonskog sporazuma koje je potrebno ispraviti. “Međunarodna zajednica radi intenzivno sa svojim partnerima u zemlji kako bi riješila ta pitanja” rekao je Inzko. “Postoji kontinuiran međunarodni napor da se Bosna i Hercegovina integrira u euro-atlantske strukture”.